

Alat berkhatan 'seminit' menang anugerah antarabangsa

Oleh [Mary Victoria Dass](#) - September 20, 2021 @ 6:27pm

bhnews@bh.com.my



Peralatan berkhatan 'Circumstar-1' ciptaan pakar bedah plastik, Datuk Dr Siew Kuang Chong. FOTO Mary Victoria Dass

JOHOR BAHRU: Rekaan dan inovasi seorang pakar bedah plastik, Datuk Dr Siew Kuang Chong, 78, menerima pengiktirafan sebagai peralatan berkhatan paling cepat, selamat dan kos rendah di seluruh dunia.

Dr Siew Kuang berkata, beliau bersyukur kerana dapat mengharumkan nama negara buat kali kedua pada tahun ini apabila inovasi diberi nama, Circumstar-1, itu merangkul pingat emas dan anugerah khas di 6th Annual International Invention Competition in Canada (iCAN) 2021 di Toronto, Canada pada 28 Ogos lalu.

Beliau berkata, pada Mac lalu, dia juga meraih pingat emas di Salon International des Inventions de Genève 2021 di Switzerland bagi ciptaan sama.

Menurutnya, sehingga kini dia berjaya merangkul 49 anugerah bagi inovasinya termasuk 25 pingat emas dan 11 pingat khas bagi produk pengguna dan peralatan perubatan di pertandingan termasuk diadakan di peringkat nasional selain di China, Hong Kong, Japan dan Thailand.

Katanya, dia tidak menyangka memenangi pingat emas serta dipilih sebagai antara 10 ciptaan terbaik dalam kalangan 700 penyertaan dari seluruh dunia termasuk 97 dari negara ini.

"Pertandingan ini adalah anjuran Toronto International Society of Innovation & Advanced Skills (TISIAS) dan saya menghantar penyertaan secara online.

"Saya mengambil masa kira-kira sembilan tahun untuk menyiapkannya dan menambah baik peralatan berkhatan sedia ada sebelum ini dan ini adalah produk buatan tempatan 100 peratus.

"Alat ini hanya mengambil masa seminit berbanding peralatan berkhatan saya cipta sebelum ini iaitu tiga minit dan ia tanpa jahitan.

"Ia adalah selamat sepenuhnya dan proses penyembuhan juga agak cepat iaitu dalam tempoh tiga minggu berbanding kebiasaannya sebulan," katanya.

Anak Johor itu berkata, inisiatifnya juga diharap menjadi inspirasi kepada generasi muda untuk berusaha mencipta produk inovasi yang berguna kepada masyarakat.

"Saya yakin faktor usia tidak menjadi penghalang kepada untuk terus mencipta produk dan saya nekad meneruskan usaha ini.

"Ada yang menasihati saya supaya berehat di rumah kerana faktor usia namun saya berasakan usia bukan halangan untuk bergerak aktif dan mencipta kejayaan.

"Rahsia kesihatan saya adalah mengamalkan diet seimbang selain bersenam hampir setiap hari," katanya.